



# Optužnica protiv Josipa Šimića

Optužen je za više djela i to krivotvorenje isprave u šest navrata, za tri prevare i lažno predstavljanje, kažu iz Tužilaštva KS-a

Istraga Tužilaštva KS-a protiv Josipa Šimića Đinđića okončana je podizanjem optužnice kojom se on tereti za više krivičnih djela. Optužnica je prosljeđena Općinskom sudu u Sarajevu na potvrđivanje.

- Predmet je formiran nakon što je Tužilaštvu KS-a dostavljen izvještaj **Državne agencije za istrage i zaštitu** u kojem je navedeno da postoji osnov sumnje da je Josip



**Josip Šimić Đinđić:**  
Optužen za više krivičnih djela

Šimić Đinđić koristio krivotvoreni dokument te agencije predavši ga Tužilaštvu BiH 28. augusta 2017. godine. Nakon efikasne istrage, Tužilaštvo KS-a kao stvarno i mjesno nadležno, podiglo je optužnicu protiv Josipa Šimića Đinđića zbog više krivičnih djela. U pitanju je šest krivičnih radnji krivotvorenja isprave, tri prevare i lažno predstavljanje, saopćeno je iz Tužilaštva KS-a.

Podsjetimo, Šimić je uhapšen 5. septembra, nakon čega mu je određen pritvor u kojem je bio sve do 6. novembra, kada je, na prijedlog sarajevskog Tužilaštva, pušten na slobodu uz određene mjere zabrane.

Općinski sud u Sarajevu, kada je odlučivao o mjerama zabrane, jedino je odbio predloženu mjeru Tužilaštva KS-a za izricanje zabrane obavljanja posla novinara. Obrazloženje je bilo da se nezaposlenoj osobi ne može odrediti mjera zabrane obavljanja posla novinara, jer osumnjičeni to svojstvo nema.

Koristio je krivotvoreni dokument **SIPA** koji je predao Tužilaštvu BiH, a tiče se navodnog prisluškivanja Tadićke i Jukićeve

Također, bitno je napomenuti da je Šimić Đinđić Tužilaštvu BiH 28. augusta dostavio krivičnu prijavu protiv ministra bezbjednosti BiH Dragana Mektića, uz koju je priložio i falsifikovani dokument **SIPA**, u kojem se navodi da je ova agencija pratila i prisluškivala vršioca dužnosti glavnog tužioca Tužilaštva BiH Gordanu Tadić i dopredsjednicu VSTV-a BiH Ružicu Jukić, te da su informacije i transkripti dostavljeni Mektiću.

Iz **SIPA** su se tada oglasili saopštenjem u kojem su naveli da Tadićeva i Jukićeva nikada nisu bile predmet njihovog rada niti su prema njima preduzimane posebne istražne radnje.

**Z. Đ.**